


胡文忠公遺集



胡文忠公遺集卷四

長沙鄭敦謹

湘鄉曾國荃

纂輯

永康胡鳳丹重編刊



陳報援軍克復崇陽本軍先期進剿先勝後挫

疏五年九月二十八日

竊臣

於九月二十一日將援軍克復通城進剿桂口

定期會師各情形具

奏在案浙江甯紹台道羅澤

南於九月十三日自桂口拔營探聞桂口之賊竄入

崇陽於城南江邊之山巔紮大營二座毀城內屋磚

砌壘高二丈壘外掘礮高二三丈以木椿竹籤層布

胡文忠遺集卷四 奏疏

圍繞砌斷大路以遏我師沿途設伏以圖截殺復於

城東門外搭架浮橋密約通山之賊數千人入城助

戰狡兔之計詭譎莫測羅澤南因集各營官會議十

四日黎明記名道員李續賓以其湘勇右營候選訓

導劉蓉以其副右營由烏龜石渡江而進同知銜候

選知縣蔣益澧以其湘勇左營防賊後襲均循河之

東岸約於浮橋東偏駐營以截賊入通山之路羅澤

南以其湘勇中營候補直隸州李杏春以其湘勇副

中營候補參將彭三元以其寶營沿河西岸而進候

補游擊普承堯率雲字寶營候補直隸州唐訓方率

訓字營居後以防賊之襲尾繞道出城之西北逼近賊營半里許駐營而賊營已包於我軍之中彭三元駐其左李杏春駐其右賊乘我師方至營壘未修遽以六七千人自壘中分兩路而來一由山脊直攻我營一由城西迂道以抄我後羅澤南傳令賊不逼營不可與戰以數十人搖旂上前佯敗數次誘賊衝至營旁羅澤南率勇破山脊而下彭三元從左路堵之各殺斃騎馬黃褂賊目二名髮長三尺奪馬四匹又擊斃當先衝鋒賊十餘名兩路之賊大敗回旂狂奔李杏春率勇由江邊而下圍繞賊壘奮力廝殺以截

賊之歸路賊不能復入其壘唐訓方普承堯亦由後路率勇疾進相與追殺賊繞城西北冀由東門渡江以逃李續賓劉蓉蔣益澧突由東岸山內殺出兩岸約其斃賊六七百名賊乃入城閉門自守羅澤南以諸勇遠行尙未午餐飭令收隊賊復以千餘人出城掘修壘外濠溝加釘木椿適蔣益澧於江面搭造浮橋以通兩岸之路羅澤南與之沿江審視知賊佯爲修壘以示堅守實無固志因卽密示東岸三營擇勇八百人西岸五營擇勇一千二百人各攜鼓角鎗礮分作數十隊於黃昏後暗伏兩岸要隘處簡選敢戰

之士數百人於二更時攜沙囊負雲梯拔去木椿竹籤緣壁而上拋放火毬火箭壘中帳房多係竹簟搭蓋一時火起光燄燭天諸勇層布壘中之賊焚死者不可計數兩岸埋伏之勇見壘中火起各擊鼓吹角施放鎗礮喊聲震天城中之賊大亂遽開北門而出踐斃於城甕者以數百計踰城墮死者無數其得出城者又爲各路之勇截殺千餘人屍橫遍野諸勇因乘勝入城燒燬賊所搭城上望樓搜捕餘匪生擒賊匪一百二十餘人卽時正法奪獲器械旂幟無算三更收隊將生擒之賊審訊供稱撲營之際爲我兵殺

斃僞五十二指揮雷春萬僞二十五指揮楊逢芳僞總制李姓一名是以速敗前任崇陽縣知縣王國楨亦於是日至營協諸紳防勦十五日隨同羅澤南入城招撫難民諭令薙髮約集士紳力行團練以圖善後此九月十四日羅澤南晝夜急勦大獲勝仗克復崇陽之實在情形也至臣之水陸各師於通城桂口告捷之後揣度賊情必由蒲咸下竄以與省城之賊相通臣因於十九日派陸師三千餘礮船十餘隻由六溪口橫入蒲圻地界駐營於車埠以安字營紮東面當茅山來路之衝而以質營紮其後鳳營恭營紮

北面彪營紫南面以當蕭橋斗門兩路之衝仁營南  
營紫於偏西以防新店之路兼以援應各營一面約  
會羅澤南定期夾攻因岳州防兵進剿微挫且探聞  
僞翼王石達開以羣賊數萬人上竄盡注於武昌南  
岸羅澤南之兵極精而少於賊數不止十倍崇陽餘  
匪搜剿須嚴敵援兵不能速至二十二日賊已悉眾  
由茅山蕭橋兩路分踞我營之前山密列陣中隔田  
隴其茅山一股悉眾來撲守備何紹彩周得魁張寅  
恭等憑隄抵禦把總張勝奎李文勝率勇應之殺斃  
當先悍賊數十名賊卽敗退諸勇并力擊之越山嶺  
而返另股復蜂擁齊下水師都司銜喻吉三開礮擊  
之橫截賊腰斃賊百十名賊復退卻我軍仍乘勝追  
至茅山而返其蕭橋之賊股數尤多儘先千總楊再  
佑領勇七百人獨當一面匹馬衝鋒揮槩殺賊立斃  
七人賊畏其勇折回茅山一路以撲何紹彩等之營  
各營亦奮勇抵禦賊不能支又折而聚於蕭橋一路  
以撲楊再佑之營楊再佑俟其涉水至半轟斃數十  
人截殺百餘人賊遂大敗退走我軍自辰至午鏖戰  
五時正值收隊而賊復折回我軍亦回軍抵擊羣賊  
蟻至彌山彌谷各營廝殺乘賊勢退卻追入山中其

山後羣賊遂草山而行橫出我軍之後各營已被圍  
繞奮殺兩時乃出重圍傷亡壯士二百餘人軍氣稍  
挫老營及水師各營均無損失此二十二日臣軍先  
期進剿蒲圻在車埠地方先勝後挫之實在情形也  
查是日以三千之勇敵二萬之賊廔戰六七時之久  
千總楊再佑等雖以追賊深入爲賊所乘究未可因  
賊多兵少坐守不戰默察該千總等敗挫之餘志節  
不衰整飭數日仍卽進剿至道員羅澤南一軍克復  
崇陽其出力員弁勇丁可否懇請  
皇上天恩準  
其擇尤彙案請獎出自  
聖裁

胡文忠遺集卷四

奏疏

五

上諭胡林翼奏羅澤南進攻崇陽克復縣城一摺 此股  
賊匪經羅澤南兩次痛剿收復城池餘黨諒已無多著  
胡林翼令地方官紳隨處截剿以清餘孽所有出力員  
弁兵勇均著擇尤彙奏候朕施恩欽此

陳報援軍分剿崇陽餘匪始勝中敗繼復大勝

疏十月初六日

竊臣於九月二十八日將援軍克復崇陽臣軍進剿

蒲圻勝負情形具 奏在案查羅澤南克復崇陽之

後因岳州防兵挫於蒲圻之羊樓司慮賊上犯以率

我軍派記名道員李續賓之湘勇右營訓導劉蓉之

副右營知縣蔣益禮之湘勇左營直隸州知州唐訓  
方之訓字營游擊普承堯之雲字寶營移駐羊樓洞  
之西禦之羅澤南自帶湘勇中營參將彭三元帶寶  
營候選同知直隸州知州李杏春帶副中營仍駐崇  
陽僞總制楊萬年者率敗賊據梯木山擾壕頭堡冀  
我師一去復踞崇陽壕頭堡距崇陽四十里羅澤南  
遂於二十二日令彭三元李杏春率其兩營往勦行  
至路口遇賊二百餘當卽擊退二十三日兩營捫藤  
攀石抵梯木山賊悉眾來拒我軍分路奮擊斃賊數  
十名焚逆賊楊萬年之窟而返忽來悍賊六七千登

胡文忠遺集卷四 奏疏

六

山瞻望列陣滿山我軍分三路應之左路中路奮力  
同進殺斃當先悍賊賊遂大潰諸勇或尾追或腰截  
賊尸徧野而右路松林之賊愈集愈多李杏春躍馬  
登山整隊以待該逆爲山所隔不知中左兩路之賊  
先潰仍洶湧并進我軍突前擊之斃大旂悍賊八九  
名賊眾反走彭三元督勇橫截而出殺賊最多餘悉  
奔白羊山往咸甯而逃計各路共斃賊八九百人內  
斃僞指揮僞將軍各一名搜獲僞印二顆奪獲大小  
旂幟七十餘件馬二十餘匹及僞制冠服詢據生擒  
之賊供稱此股逆匪不下三萬人逆首石達開統之

由金陵上竄至武昌縣取道金午昨夜始宿咸甯今  
之戰敗者乃其前隊也二十四日羅澤南以書促彭  
三元李杏春歸營而逆賊大至約二萬人鎗礮環施  
火箭噴筒交下彭三元李杏春見賊甚眾飭諸勇不  
遠追身先士卒擇隘堵殺追至田隴而返我返而賊  
又蜂擁而至如是者二三十合賊一處來則一路應  
之數路來則數路應之彭三元耳受礮傷血流滿襟  
李杏春勸其回營而彭三元戰益力曰今日誓同生  
死雖傷何忍獨歸蓋自卯至申已鏖戰五時之久矣  
賊乃敗退計共斃賊百餘名生擒八名勇丁亦陣亡

六名羅澤南是日申刻在崇陽聞信以從九李續宜  
率中營三百人援之並飛調蔣益澧率左營由羊樓  
洞來援二十五日寅刻羅澤南自帶中營二百五十  
人繼進而賊之在咸甯者黎明時已盡數來攻崇陽  
土匪從而附之數倍於前繞營三面彭三元李杏春  
相與誓曰男兒以身許國死生久已不顧今日誓必  
盡殺此賊各跨馬分路堵禦相持者踰兩時礮子噴  
筒連環迭至彭三元李杏春不少卻賊之另股忽繞  
後路入營放火回馬救之賊眾尾追彭三元大呼殺  
賊手刃黃馬褂賊日一名爲羣賊殺於馬下李杏春

勒馬衝至隨丁勸之走且憤且詈曰彭參將死我何  
獨生爲亦遂殉難其義烈如此把總蕭馥山始終隨  
李杏春左右爲賊所刃把總李光熾居營守輜重聞  
其兄杏春死目皆怒裂同時死之守備銜千總彭獻  
傑藍翎把總胡元則把總劉碧山率中營三百人獨  
當一面與賊力戰賊不敢逼及營中火起遂各執哨  
旂殺入賊中而死是時勇丁以營官陣亡且戰且卻  
迨羅澤南督勇馳援距營十里而事已無及矣列隊  
山岡以集勇丁賊見我兵繼至不敢窮追日暮乃悉  
率歸崇陽時蔣益澧已駐軍城外卽下馬相商以我

師分駐崇陽羊樓兩路兵力本單賊勢方盛必爲所  
乘若專駐崇陽則南路空虛使賊由蒲圻上犯與湖  
北大營聲息隔絕乃定計以五鼓移師羊樓洞弁力  
駐守此九月二十二三四五等日羅澤南分勦餘匪  
突遇首逆大股始勝中敗彭三元李杏春等血戰陣  
亡之實在情形也羅澤南於二十六日午刻馳抵羊  
樓洞方令傳餐而大股賊由蒲圻突來澤南與李續  
賓登山審察約二萬餘賊屯聚山巔爲二大枝其一  
枝循山而下踰田隴又分三枝直逼訓營右營副右  
營吹角放鎗黃旗遍野是爲賊之正兵其一掩旗息

鼓葦山蛇行埋匿於七里冲山內是爲賊之奇兵冀誘我師禦其正兵而其奇兵襲後撲入我營羅澤南會商各營以我師自崇陽至者血戰三日遠行一百餘里令少息毋遽出戰而令劉蓉率其營以擊田隴賊陣之腰李續賓率其營從左路石山繞出以截田隴賊陣之尾唐訓方則以其營三哨當田隴之正賊以二哨搜其營前山內之伏賊普承堯則分其營爲三路以搜七里冲諸山之伏賊部署甫定而中營副中營左營寶營之自崇陽至者爭請於前誓必報昨仇澤南義之因示以策應之畧賊之在田隴者見訓營三哨人少直前攻撲我兵按立不動俟賊逼近突以鎗轟之鏖戰移時賊不能敵劉蓉率副右營從中段橫截賊亂反旗而走諸勇圍之不得出其在後者回奔上山遇李續賓右營已繞至山巔截殺蔣益澧率左營策應賊之正兵大敗而山內之伏賊不知也猶躍躍思出中營副中營從左路無賊之處繞出山巔將賊包裹其中普承堯則率其營直從山口分路迎頭殺入老寶營繼之賊之奇兵亦大敗各勇分途追殺十餘里日暮收隊計共斃長髮賊九百餘名內有黃姓僞總制一名李姓僞指揮一名身懷僞印奪

獲黃旗八十餘面馬三十餘匹軍火器械無算生擒  
長髮賊七十餘名訊據賊匪僞國宗韋俊自鄂省率  
賊二萬餘由紙坊至蒲圻冀以抗拒援軍不能下攻  
等語因設彭三元李杏春等之靈殺生擒賊以祭此  
九月二十六日羅澤南會師羊樓洞大獲勝仗之實  
在情形也參將彭三元舊隸前提督塔齊布部下師  
法忠勇稟承方畧身經百餘戰屢立奇功前於克復  
通城崇陽案內擬保副將候選同知直隸州李杏春  
學問深醇日以殺賊爲志節概凜然通城崇陽案內  
擬保知府均尙未稟詳茲以一千三百之眾遇悍賊

胡文忠遺集卷四

奏疏

十

數萬始而大勝繼而力戰三日士無退志力竭捐軀  
深堪憫惜彭三元可否請

旨追贈副將銜照副

將例從優議卹李杏春請贈知府銜照知府例從優  
議卹守備銜千總彭獻傑每戰必先奮不顧身請以  
都司例優卹藍翎把總胡元則把總李光熾蕭馥山  
劉碧山均請以千總例優卹并請附入湖南新建前  
提督塔齊布專祠以慰忠魂其餘陣亡受傷勇目并  
出力員弁容卽查明彙案分別 奏咨懇請獎卹出

自 恩施羅澤南一軍五千人由江西入境連復  
兩城所向克捷因岳州兵挫崇陽賊多軍分而三遂

致中挫移師合勦繼復大勝該道員以新失二將稟  
請交部嚴議之處伏候 聖裁臣軍先於二十二

日在蒲圻挫失刻已整理與羅澤南會攻蒲圻卽以  
水陸并進直搗金口理合將援軍搜捕突遇大股始  
勝中敗繼復大勝并懇請獎卹緣由由驛六百里馳  
奏

再湖北爲東南輿區商賈繁庶連年被賊州縣舊商  
失業新集牙行均無印帖查行帖向由部頒到司各  
州縣加具殷實印結請領轉發而外省陋習規費相  
因吏胥中飽究於公費毫無補益臣訪察積弊有一

胡文忠遺集卷四

奏疏

十一

帖費至數百金或千金者忘公徇私比比皆是茲據  
總辦捐輸釐金局紳員外郎胡大任等呈稱新商無  
從請帖可否咨部先行頒給各色行帖二千張令各  
市鎮向捐局按例請領并將從前各衙門陋規一并  
算入正款勸其捐輸給以行帖等因前來惟臣營既  
無科則卽兼署藩司羅遵殿遠在襄陽亦無例案可  
稽應請 敕下戶部頒給各行牙帖二千張并則

例條款由驛遞發臣營轉交捐局遴派公正士紳妥

爲辦理以資軍需如果試行有效再爲 奏請推廣

杜胥吏之侵漁資軍需之正款既便商情無傷政體

其捐資請領者由總局報明彙冊咨部并札行司道州縣備案所指成數仍歸於軍餉案內覈實報部又查舊例生監各衿不準充行推原律意士大夫之行不可爲商賈之事所以示節制嚴壟斷也訪查近年弊竇有生監隱名而充行之人有行戶居積而改捐職銜之人循名覈實未能盡一應請此後生監職銜人等準其領充以廣招徠其身入仕途名列科第者仍不準承充以示限制而符定例是否有當伏乞

皇上聖鑒訓示

硃批該部速議具奏

胡文忠遺集卷四

奏疏

七

上諭胡林翼奏援軍分剿崇陽餘匪突遇大股截剿獲勝

一摺 此股賊匪現尙分踞咸甯蒲圻著該署撫迅卽

會同羅澤南合力攻剿以期埽蕩賊氛直搗武漢毋稍

延緩所有在事出力員弁著該署撫擇尤保奏候朕

施恩此次奮勇殺賊力竭陣亡之參將彭三元著追贈

副將銜照副將例從優議卹候選同知直隸州知縣李

杏春著追贈知府銜照知府例從優議卹千總彭獻傑

著照都司例從優議卹藍翎把總胡元則把總李光熾

蕭馥山劉碧山均照千總例從優議卹並準其附入湖

南地方塔齊布專祠以慰忠魂羅澤南帶兵由江西入

楚境連復兩城此次以少擊多雖致中挫仍復大勝所有自請嚴議之處著加恩寬免欽此十月十八日奉

上諭前據胡林翼奏逆首石達開率賊數萬上竄早慮羅澤南兵單不敵恐有挫失已諭知官文派撥精兵前往接應覽本日該署撫奏羅澤南一軍接仗情形將士兵勇均能奮不顧身以少擊眾惟彭三元李杏春俱衝鋒殞命殊爲可惜雖二十六日羊樓洞之捷尙能轉敗爲勝士氣不衰究竟傷損精銳皆因兵單所致胡林翼所統各軍旣已力加整頓卽著與羅澤南會合直抵蒲圻石達開韋俊均係著名悍賊現旣膺聚咸甯卽應合力

進攻能將該逆殲戮則咸蒲一帶賊匪必自瓦解羅澤南之兵本紮崇陽羊樓兩處今旣併歸羊樓則崇通後路有何接應此時賊勢甚熾攻剿機宜固不在專守城池而此軍一移誠恐得而復失不特前功可惜抑且後顧堪虞應調何處兵勇以爲後路接應該署撫卽與官文商酌如荊州新到川兵及德安得勝兵丁皆可分撥著該署撫飛咨官文迅速調度羅澤南一軍於剿賊極有關繫而崇通咸蒲又爲江西湖南四達之衝該逆旣

以全力來抗我軍亦必併力會攻始能得手此處關鍵一得卽可乘勝長驅由金口直趨武漢切勿稍存大意

致誤事機再該署撫兩次摺內均有岳州兵挫之語是  
否係湖南防兵逆賊是否不至上竄未見駱秉章奏報  
並著該署撫將詳細情形附報具奏以慰厯念彭三元  
等應得賄卹已照所請降旨並將羅澤南處分寬免出  
力員弁準其擇尤保奏矣將此由六百里諭知胡林翼  
並羅澤南知之欽此 月 日奉軍機字寄

陳報官軍剿賊大勝會師蒲圻水陸並進疏十

月二十二日

竊臣於十月初六日將援軍搜捕情形具 奏在案

查羅澤南合師羊樓洞大勝之後軍聲益振以濠頭

胡文忠遺集卷四 奏疏

十四

堡之役竇營副中營之營官陣亡乃兼管副中營之  
事其竇營七百人則分隸於游擊普承堯道員李續  
騰鴻之湘勇五百人以厚其力擬俟休養旬日卽下  
攻蒲圻乃崇陽之賊首韋俊自九月二十六日敗後  
復集殘喘沿途裹脅並添撥逆首石達開悍賊數千  
共二萬餘人於十月初三日自蒲圻分途來撲其由  
東路楓樹嶺雷家橋沿七里衝而入者則橫排羊樓  
洞北田隴旌旗蔽野約萬餘人漸次前進每進數十  
丈輒止我兵不動則又進進則相與大呼聲震山谷

如是者歷二時一股由于嶂嶺張鼓嶺踰山而來約四五千人列陣於營北韋逆張黃蓋踞山巔按陣不動俯瞰我師一股約二三千人由港口驛循中港而至列陣於葉家山冀以牽制我西面諸營不得併力進攻羅澤南駐營山上審視瞭如示各營以策應之畧飭令賊不逼營毋遽出戰東路一股愈逼愈近忽分三路一路登小石山撲我左營一路據麥園以防中營之橫截一路循山脊直逼右營道員李續賓督勇擊之與賊交鋒殺斃當先悍賊五六人山脊之賊敗羅澤南率中營副中營分三路繞攻麥園知縣蔣

益澧分其左營爲二一登小石山一繞山北抄之一鼓而前賊眾大潰溺斃於園外池塘者百餘人竄伏於松林密箐中者諸勇繞之截殺五六百人大股由田隴狂奔急不能擇散布山谷右營從七里冲之右脊而上中營副中營循中脊左營登左脊三路圍剿奮登其巔其在山谷者千餘人皆刃之逸出者各營又追殺十餘里而後止營北山巔之賊見大股已敗猶思據險自固訓導劉蓉率副右營分路仰攻殺斃當先悍賊數人賊潰唐訓方率訓營由張鼓嶺橫截之葉家山之賊游移觀望普承堯以其寶勇二營暗

擊之賊駭而奔劉騰鴻率陽字營抄其西署蒲圻縣  
孫守信率勇包其左四路截殺尸橫遍野亦追至十  
里外而止計是戰共斃賊二千餘人奪獲黃湖緡大  
旗三十餘面小旗七十餘面馬四匹刀矛之棄於道  
路者數千件我軍皆取之以歸生擒一百一十餘名  
據俱韋逆受石逆密約奮力攻我以圖上襲岳州石  
逆卽由通城攻平江共犯湖南不料復敗等語審明  
正法此羅澤南十月初三日在羊樓洞大獲勝仗之  
實在情形也十三日臣由嘉魚取道至羊樓洞與羅

澤南會商密圖進取惟十月初二初三初五等日湖

胡文忠遺集卷四

奏疏

六

南平江縣紳士在通城防勦勇丁二千人與首逆石  
達開之賊血戰數日初五日平營被蹋退守平江上

塔市臣

抵羊樓洞與羅澤南面商賊之嘯聚崇通故

作上竄湖南之勢者不過牽制我師使不得遽攻下  
游搗其巢穴若我軍久駐羊樓洞以堵上竄時日遷  
延適足老師若復轉搜崇通則兵進賊遁兵退賊出  
多方誤我往返皆疲莫如併力急攻直下蒲圻攻其  
所必救也羅澤南之軍與臣之陸軍均於十七日拔  
營前進并約楊載福派水師進紮新灘口牌洲相機  
直下臣仍一面飛咨湖南嚴防不虞庶無瞻前顧後

之慮得以專意進取藉紓

宸厯至羅澤南營中

出力員弁勇丁可否由臣查明彙案請獎伏候

恩旨以昭激勸

上諭胡林翼奏羊樓洞官軍剿賊大勝一摺 現在胡林

翼已統軍與羅澤南會合著即併力進攻盡殲醜類所

有殺賊出力員弁兵勇著胡林翼彙案請獎候朕施恩

欽此 十一月十二日奉

再湖北賊勢自秋冬以來大股專注於南岸即下游

金陵皖江之賊亦專以逼脅多人分股上竄為計而

總不離沿江兩岸求所以制賊之死命者惟以精水

胡文忠遺集卷四

奏疏

七

師斷賊糧為先務之要或疑賊之擄掠銀錢聚於金

陵財多人眾日增猖獗為慮臣愚以為不然自來盜

賊之擾害其志專在財利彼豈能以財利予人哉即

至窮蹙忍不能舍固賊情之常也夷考古今平賊之

畧必以據上游形勢斷賊糧為先而財帛之豐歉不

與焉武漢則金陵之上游也荆襄關南北之大局而

武漢又荆襄之咽喉兩湖及巴蜀之米多於吳會故

諺有湖廣熟天下足之語昔年江面安靜米艘蔽江

而下日夜轉輸今乃久為賊阻通籌吳楚之全勢必

以武漢得手設立重鎮屹然不可再搖乃會合江西

內湖一軍以水師之全力制賊而下游紅單巨艦亦得并力以扼賊吭惟查水師將才以副將楊載福爲最忠勇廉明每戰必先自道員彭玉麟調往江西之後外江水師僅恃楊載福一員積年力戰肺病日增而滅賊之志終始不渝病不言勞功不言賞志識已高出尋常其十營將官如游擊李成謀都司鮑超張榮貴等均勇敢冠軍惟未經特將尙待悉心審察觀其戰陣之方畧別其才識之利鈍再行詳悉 奏聞

此則水師將才之宜預籌者也署臬司李孟羣以礮船六十隻入湖冬令水涸不能繞出襄河停泊沙市

胡文忠遺集卷四

奏疏

六

等處距漢陽尙數百里營中將弁勇目未能精實頗難力戰業已嚴飭該司慎守船礮毋許資賊致貽禍根外江水師船多礮少取給湖南礮局暫可供用惟模範較小不如粵東所購洋礮之美查上年侍郎 臣曾國藩 奏請礮位因道梗未經運竣應請 皇

上天恩敕下兩廣督 臣葉名琛購運五百斤以上千

斤以下洋礮六百尊派兵妥護交湖南舟運湖北期

以冬杪交付轉交待郎 臣曾國藩勻配以資異日東

征利用此又礮位之宜預備者也謹附片 奏

胡文忠公遺集卷五

長沙鄭敦謹

纂輯

永康胡鳳丹重編刊

湘鄉曾國荃

官軍會勦蒲圻克復城池疏

五年十一月初一日

竊臣於十月十七日由羊樓洞拔營下攻蒲圻臣仁

鳳彪恭四營會同羅澤南七營共十二營相爲聯絡軍威益壯而逆渠韋賊等自初三日敗後收集殘喘萬餘乞救於逆渠石達開分四千人令偽總制李賊率之來會兼集崇通土匪不下三萬人踞於蒲圻守具日增於鳳皇山之麓五嶽觀之巔築大營二座於

胡文忠遺集卷五

奏疏

南門外築大營二座豐樂門外築大營一座各營之間設立石卡以扼入城之要河之北岸築木城四座以通咸甯江夏之賊搭造浮橋以濟之冀阻我師之下攻也我軍以重險難越十九日乃探署蒲圻縣孫守信及蒲圻縣舉人賀霽若之議由間道出公安曠進駐鐵山臨城西北隅賊壘遽失其險鐵山高二里縣亘數里與豐樂門之雞冠山相峙其東南爲鳳皇山西北爲河邊寶塔一帶諸山形勢雄險臣等以五營駐山脊俯瞰城中四營駐山西北三營駐山東南以便分路進攻因我軍野戰則易於取勝攻堅則受

傷必多計誘賊眾來襲庶可一鼓盪平二十日遣捷  
勇數百直逼賊壘搦戰賊出則反旂而走賊退又往  
如是者歷一日賊不敢遠追二十一日辰刻羅澤南  
率中營候選訓導劉蓉率副右營從山右田隴而下  
攻南門外賊壘李續賓率右營從雞冠山脊而下攻  
豐樂門賊壘同知銜候選知縣蔣益澧率左營候選  
直隸州知州唐訓方率訓字營從田隴之右林木中  
繞出攻五嶽觀賊壘守備周得魁率鳳營守備何紹  
彩率仁營駐鳳皇山防賊之伏候補游擊普承堯率  
寶勇湖南委紳劉騰鴻率陽字營千總楊再佑率彪  
營從山之左而下駐寶塔諸山截河北之賊兼以攻  
城張寅恭率恭營同知銜候選知縣邢高魁附生李  
景湖把總周有元率南營以攻城之西北孫守信帶  
武生汪士哲等團練數百人分布於要隘之間以供  
指揮臣軍方出北岸賊眾紛紛渡河來救普承堯劉  
騰鴻楊再佑邢高魁張寅恭李景湖率諸勇截之沿  
岸廝殺北岸之賊不敢渡復督諸勇屢抵城根以擡  
鎗仰攻守城之賊皆應聲而倒或緣梯而上或肉薄  
而登如是者三四次爲賊之滾木亂石所阻終莫能  
上首先攻城登時陣亡者守備銜千總楊再佑外委

韋順清從九蔣文彬郭祥基也城中之賊爲我所截亦無出救賊壘者壘中多長髮老賊其營皆立於山巔峻險異常木柵竹簽回互曲折是賊長技我軍從下仰攻其勢逆而難賊從上俯禦其勢順而易李續賓率右營之勇由雞冠山直薄豐樂門賊壘奮勇而上折毀木柵各營亦極力分攻皆堅不可奪賊出柵來追諸勇乘賊之出反旂廝殺賊又入柵以自固如是者六七次爲賊之火毯大礮所阻終莫能入首先攻壘登時陣亡者把總張九錫易光榮黃德榮也賊爲我軍擊斃者眾亦無敢出壘迎敵者豐樂門南門

二壘之間賊立重卡大石鱗次樹木縱橫路曲而隘不能容數人卡內有小坡賊之悍者悉萃之我軍因攻壘不下轉而攻卡賊以死力拒守隘口兩壘以大礮橫擊之諸勇奮力爭入雖傷亡者眾毫無畏心血戰二時旋而退亦旋而進如是者七八次爲地勢所阻又莫能入首先攻卡登時陣亡者都司楊泰友守備楊佐清也賊之頭目爲我軍所擊斃者多亦無敢踰卡來襲者羅澤南李續賓劉蓉蔣益澧等會商令諸勇暫駐山坡據險以待休息片時約各營誓曰今日不破此壘賊勢必張將堅守以老我師如九江故

事蒲圻不下武漢必不能攻須力戰勝之而後已諸  
勇聞之皆流涕誓不破此壘不歸劉蓉之弟文童劉  
蕃親率諸勇取稻草柴薪往燒賊壘賊以大礮鳥鎗  
轟擊劉蕃身先士卒不稍退避逼近木柵中礮陣亡  
諸勇憤之荷芻負薪奮迅而進縱火焚燒烈焰突起  
賊眾乃亂乘機奪柵以入蔣益澧親率左營殺入東  
嶽觀之壘唐訓方率訓營周得魁率鳳營何紹彩率  
仁營殺入河邊之壘諸壘賊潰劉蓉率副右營及中  
營二哨之勇四面攻擊分途截殺而豐樂門與南門  
壘中之賊猶恃險如故羅澤南李續賓督中右二營

胡文忠遺集卷五

奏疏

四

之勇乘勢殺入重卡臣遣張寅恭率恭營從城西北  
殺入連用大礮轟擊賊莫能當張寅恭先射賊目策  
馬躍入壘中普承堯之弟六品軍功普承忠率寶勇  
孫守信率勇繼之奪柵以入賊壘五處陸續火發光  
燄冲突煙霧蔽野士卒歡呼聲震山谷賊之負壘不  
出焚死者二千計其逃潰者城閉不得入爲諸勇所  
殺者以千計內斃首戴金龍僞冠賊目十餘名冠上  
多書總制指揮字樣其餘涉河逃溺死者無算屍橫  
遍野血流滿溪霎時之間重卡頓破五營俱踣所未  
下者僅一城耳因久戰力倦將士皆飢飭令各營收

隊該逆大敗之後一見我師歸營北岸之賊復渡河入城弱者議欲棄城而逃強者猶冀死守以拒黃昏而後臣派李續賓帶勇士百餘人踞雞冠山頂俯驚賊營蔣益澧帶勇從鳳皇山下防賊南竄崇陽之路普承堯劉騰鴻帶勇出城西門外山上張寅恭周有元帶勇出寶塔山上循環施放火鎗吹角掌號賊驚莫測在西城者則傳官兵已入東門在南城者則傳官兵已破北門紛紛大亂各自奔逃我軍勇士直逼城下緣梯而上施放火毬火箭諸賊盡從北門以出踐踏於門竇墮溺河中爭先擁擠黑夜自相戕殺

者又以千計北城爲賊糧所聚又逆渠僞署之所在軍器最多賊急不能運自行縱火焚燒城中之賊以城門火起急不能出縋城而下爲城上滾木所壓及跌死於竹簽木刺者無算諸勇相繼入城搜殺長髮老賊五六百名二十二日黎明渡河將北岸賊營四座盡行焚燒跡賊所遁之路數里外猶血流滿道兩日一夜約殺斃焚斃溺斃五千餘人生擒一百七十餘名奪獲馬四十餘匹大小旗幟三百餘面僞服僞冠軍裝糧食無數是役也以全力攻堅將士同心效命日夜血戰軍無退志得以踏破賊營九座克復城

池羅澤南李續賓自通城崇陽克復二城後桂口濠頭堡羊樓洞等處屢戰大勝功績最高迭奉 恩

旨準其彙案保奏應以通城崇陽蒲圻三城並歸一案除羅澤南李續賓另片懇請 恩施外所有克

復通城崇陽蒲圻三城在事出力員弁謹擇尤先行

奏保以示鼓勵藍翎候選直隸州知州唐訓方操練營勇精悍敢戰懇請加知府銜 賞換花翎同

知銜藍翎候選知縣蔣益澧身先士卒不避艱險懇請以同知補用 賞換花翎訓導劉蓉籌畫大局

動中機宜克復三城屢立奇功懇請以知縣補用加

胡文忠遺集卷五奏疏

六

同知銜並

賞戴花翎候補游擊普承堯質直無

飾士樂用命懇請以參將儘先畱於湖北補用藍翎

都司朱品隆曉習軍務轉戰無前義甯州案內請保

游擊歸江西辦理又克復三城懇請以參將畱於湖北遇缺補用並 賞換花翎都司銜藍翎守備劉

錫文藍翎守備周寬世張文煥督勇殺賊精悍無敵

義甯州案內請保都司歸江西辦理又克復三城懇

請以游擊儘先補用守備銜藍翎千總陳光孚藍翎

千總劉人和王名治攻陷堅城每戰必先義甯州案

內請保守備歸江西辦理又克復三城懇請以都司

儘先補用藍翎把總朱升開錢得勝何習藝先登陷陣所向有功義甯州案內請保千總歸江西辦理又克復三城懇請以守備儘先補用六品軍功李見榮倡眾殺賊不避艱險克復三城功力最著懇請以千總拔補

賞戴藍翎六品軍功普承忠摧堅陷陣懇請以把總拔補

賞戴藍翎藍翎把總楊德武

張福田首先陷陣所向有功義甯州案內擬保千總

又克復三城懇請以守備補用已革湖南鎮溪營游

擊張寅恭經前署湖廣督臣張亮基以性情乖謬訓

練並不認真劾參查該員秉性粗直核其原案尙非

胡文忠遺集卷五

奏疏

七

退縮失守可比此次奮勇冠軍首先躍入賊壘可否開復原官之處伏候

聖裁升用同知署蒲圻縣

知縣孫守信自正月至於九月團練力守迭戰有功

及韋逆大股二三萬人上犯縣城該員力戰受傷退

保鄉里團練尙未解散隨同官軍克復城池功多於

過可否懇請免議其餘克復三城迭次戰績在事出力員弁勇丁容

臣

查明並歸一案開單懇請

恩

施至文章劉蕃忠義至性屢立奇功克復各城尙未

稟詳此次首先焚燒賊壘爲我師成功之轉機懇請

追贈知縣照知縣例優卹都司楊泰友身經百戰義

甯州案內請保游擊又克復各城請照參將例優卹  
守備銜儘先千總楊佐清楊再佑奮勇無敵爭先致  
力請照都司例優卹把總劉祥雲易光榮黃德榮張  
九錫外委韋順清奮攻城壘不稍退先後陣亡通  
城崇陽案內擬保千總請照守備例優卹從九蔣文  
彬郭祥基請照縣丞例優卹其餘傷亡勇丁查明另  
案請卹

謹按奏內所請獎卹及開復免議各員於十一  
月二十七日接奉

旨準

胡文忠遺集卷五 奏疏

八

再臣於上年會合布政使銜浙江甯紹台道羅澤南  
記名道安慶府知府李續賓之師在九江湖口連營  
一月見其每戰必先忠勇冠時本年十月十四日取  
道嘉魚會於蒲圻其營中將士勇敢樸誠有古烈士  
風察其所用之材則皆羅澤南所教弟子及其祖若  
父之門生也軍中得閱該員家書羅澤南之父羅嘉  
旦年八十歲李續賓之父李登勝年七十歲勗以忠  
勇報國不得私念親老眷戀庭闈詞意嚴正大義  
可風是該員等之忠義奮發實皆稟承家訓伏思我

皇上孝治天下

堯思舜慕化及四表每遇

覃恩封贈內外臣工之父母並祖父母下至微末員弁亦得均承 恩澤 錫類推仁淪肌浹髓

該員等身經百戰已蒙 特恩加銜並 簡

任實缺核與請封之例相符且屢次稟稱受 恩

深重不敢再邀議敘可否仰懇 皇上天恩將布

政使銜浙江甯紹台道羅澤南 賞給其祖父母

父母二品封典記名道安慶府知府李續賓 賞

加鹽運使銜給其父母三品封典如蒙 俞允在

該員等感激 恩施格外必仰體 教孝作忠

之義以報 高厚鴻慈於萬一而海內仁人孝子

胡文忠遺集卷五 奏疏

九

亦知戰陣無勇不得為孝自當聞風興起實於

聖朝教化大有裨益並請 敕下廷 核議凡戰

功最著者始準援引此外不得援以為例 愚昧之

見伏乞 皇上聖鑒訓示

謹按此疏於十一月二十日接奉

旨準

再 臣於十月二十八日蒲圻營次欽奉十月十八日

上諭飭與羅澤南會合直抵蒲圻與官文商酌

如荊州新到川兵及德安得勝兵丁皆可分撥著飛

咨官文迅速調度該署撫兩次摺內均有岳州兵挫

之語是否係湖南防兵逆賊是否不至上竄著該署撫將詳細情形附報具奏等因欽此跪聆之下仰見

聖謨廣運感悚難名臣查大股賊匪注於蒲威

臣軍與羅澤南會合克復蒲圻即當由咸甯進剿訊

據賊供韋逆已遁回武昌石逆一股有分竄江西之

信湖南岳州一帶尙無逆賊竄擾先是岳州防兵於

九月十五日越羊樓司而剿賊失挫仍退守岳州羅

澤南恐大股之上竄也分軍於蒲圻羊樓洞以禦之

不虞在濠頭堡而中挫臣於九月二十二日獨由六

溪口入攻又挫於車埠而賊亦遂退守蒲圻不復上

胡文忠遺集卷五 奏疏

犯矣目下情形蒲圻克復崇通亦探無賊蹤自應遵

奉臣恩訓併力會攻乘勝長驅由金口直趨武漢

臣等一軍分則力單合則力厚崇通是大軍後路而

急切實無兵力可分德安兵勇雖多聞亦惟前都統

西凌阿之馬隊及顏朝斌之川勇乃能應敵此外兵

勇將弁難期精實臣於八月九月尙分兵以應之恐

不能再分兵以應南岸惟武昌城大臣等進攻之時

應於金口等處畱兵以通餉道屆期再與督臣官文

商酌調遣以慰臣宸念再二十一日之戰臣之彪

營恭營羅澤南之湘中營李續賓之右營蔣益澧之

左營摧堅力戰瘡痍頗多臣等密察賊勢則應乘機以速破之而體察軍情又須稍爲撫養擬再調治五六日卽由驛路直搗咸甯江夏到金口以後與水師會商如應以水師分截上游下游則楊載福之才可當一路臣亦當竭力以督帥一路緩急情形現難踰度容再隨摺陳奏

陳奏陸軍克復咸甯山坡進兵紙坊水師克復

金口進屯沌口疏十一月二十一日

臣於本月初一日將克復蒲圻大獲勝仗情形具

奏在案初八日臣派仁營鳳營恭營南營彪營自蒲

胡文忠遺集卷五

奏疏

十一

圻啟行初十日駐咸甯城西一里之柏家山初九日羅澤南飭湘訓寶陽七營啟行初十日駐汀泗橋距咸甯三十里不意武昌省城賊匪復約集興國大冶之賊五六千人及臣軍甫至而賊已先據城賊旂遍布城上矣恭營營官張寅恭南營營官李景湖於駐營後各帶勇百人往視形勢城西一溪環繞淺者三四尺深者不可測有木橋以通行人橋上有亭賊以石塞之把總瞿高魁吳玉清直逼橋前賊以千餘人從城之西北門蜂擁而出踰橋堵截瞿高魁殺賊十餘人力竭死之賊分三路而進直撲我營同知銜侯

選知縣邢高魁迅商各營分三路應之仁營守備何紹彩鳳營守備周得魁從營左繞出恭營張寅恭繼之以抄賊尾彪營千總陳玉輝從營右繞出涉溪水以擊賊腰邢高魁帶同千總李洪鈞守備銜李文盛率其親兵李景湖帶同周有元馬方武率南營迎頭堵殺賊三路死拒鏖戰二時之久賊遂大敗乘勝追至橋頭日暮收隊共殺賊百餘名生擒八名奪獲大小黃旂二十餘面軍械百餘件三更時賊復率眾撲營逼近牆壘各營排列礮石靜以待之賊見我軍屹立不動慙時乃退羅澤南在汀泗橋聞信即時傳餐

率各營四鼓前進十一日黎明至咸甯城西橋前山上駐營時方大霧軍行無聲賊始不知日出霧收突見城外多壘賊眾大亂縱火焚燒橋亭使我軍無進攻之路羅澤南同李續賓傳示湘訓寶陽七營以攻城之西北邢高魁等率仁鳳恭南彪五營攻城之東南諸勇或從橋上撲火而進或由水之淺處裸身而涉無不一以當十直逼城下攀緣而登焚燒城上賊棚賊眾盡從東門逃出分途截殺斃賊又數百人追至十里之遙而止隨即入城安撫難民傳諭紳士力行團練此十一月初十日十一日克復咸甯之實在

情形也十三日羅澤南率湘訓寶陽各營由咸甯拔營夜駐桃林鋪探知逆賊於咸甯敗後下竄江夏縣之山坡驛復乞救武昌城內之賊共得八九千餘人蜂聚驛店於山坡上五里四姑腦地方擄民修築土城以爲頭卡於山坡下五里街修葺木壘以爲二卡冀以抗拒我師不得下勦又埋伏悍賊於驛路左右山中以衝我之行陣羅澤南計乘賊壘未就速行進攻於十四日黎明派湘勇右營中營訓字營寶營爲前隊輜重繼之湘勇左營陽字營爲後隊以護輜重兼防遠山之伏行至四姑腦近處突遇賊匪分三路

胡文忠遺集卷五

奏疏

三

而來一見我師遽作橫陣排列山岡暗分大股出左路樹林後計誘我師前進橫截其後羅澤南與記名道李續賓等商定進攻之策李續賓率右營候補府經歷縣丞蕭積仰同知吳坤修率副右營以禦中路大股候補直隸州知州唐訓方率訓字營以禦右路候補游擊普承堯同弟普承忠率寶勇以禦左路羅澤南同知縣孫守信率中營副中營暗伏左路樹林之前以防賊之伏賊乘我師列陣未就遽分三路來撲搖旂吹角喊聲震谷我師三路應之鏖戰良久殺斃其前鋒數十人賊敗走乘勝追殺賊至山坡驛前

復據險頓旂以待蓋冀樹林之伏賊橫截我後以相  
與夾擊也羅澤南等率中營從樹林截出賊不虞我  
之突至遽施火鎗噴筒以拒我師奮力衝突殪其前  
鋒二十餘人林後之賊亦敗爲諸勇所遏不能回驛  
由驛左山坳以竄山坡之賊方在抵敵遙見伏兵已  
破而各路兵勇奮殺遂盡從驛北以竄同知銜候補  
知縣蔣益澧率左營軍功劉騰鴻率陽字營聞前路  
礮聲不絕知與賊戰卽搜殺遠山伏賊趕緊前進與  
前隊共相追殺賊之衣被鹽米及逆渠之僞轎僞服  
僞書棄於道追至十五里外之降仙橋而止賊壘之

將成者盡爲折毀各路共殺斃賊千餘人內斃僞副  
將軍一名指揮二名身懷僞印生擒六十餘名奪獲  
大小黃旂八十餘面鳥鎗擡鎗七十餘件軍器無算  
未刻收隊訊據生擒賊稱僞國宗楊逆係首逆楊秀  
清之死黨十月初三日羊樓洞之戰身受鎗傷死於  
咸甯二十一日蒲圻之戰僞國宗韋逆敗回武昌急  
調各路之賊誓相死守因我兵未遽下攻以韋逆守  
省城洪逆上據咸甯咸甯敗洪逆退守山坡不意復  
敗等語此十一月十四日進剿山坡大獲勝仗之實  
在情形也金口爲水陸之要衝賊踞日久牆壁尤堅

臣思陸路正兵由蒲咸驛路而進賊必探知準備臣

當先以偏師循江岸搗金口則水陸之聲援可通而賊亦不虞官兵之驟至金口關隘可奪而有也初八

日臣楊載福飭水師自六溪口拔營以中營游擊銜

都司鮑超副中營都司銜守備李濟清前營都司王

明山副前營都司銜守備萬化林副左營守備銜千

總陳金鼇五營循江南岸而下而自率水師右營游

擊李成謀副右營都司張榮貴左營游擊張啟基後

營游擊曾秉忠定湘營守備銜千總段康侯五營循

江北岸繼發又飭副將王國才帶陸勇循北岸以渡

胡文忠遺集卷五

奏疏

五

新灘口賊聞我軍北岸已復湏口復蔡店進逼漢陽

南岸復蒲咸破山坡而由驛進發其新灘口紗帽山

魚馬頭老鶴嘴牌洲上下各處之賊股數不多聞風

卽潰而皆竄聚於金口水陸夾護以禦我師十二日

水師五更出隊已刻至金口地方尙隔里許賊以拖

罟快蟹大礮船數十號及長龍舳板快划數十百號

泊於金口以賊壘五處護之我軍船初至賊以大礮

船橫排中流子如雨點以快划梭織往來上下如飛

鮑超李濟清王明山萬化林陳金鼇五營相與會議賊之戰艦頗多須先時布置分枝以清眉目而後責

成可專又須合力以聯聲勢而後兵力可足議定鮑超由中路奮勇當先陳金鼉萬化林繼之李濟清抄其左王明山抄其右四面圍擊塵戰逾時賊以千劔大礮排列施放四遍我軍以戰艦排列施放六遍賊怯而不敢進我軍弁勇中礮受傷而進步愈速每放一輪卽進十餘丈六遍之後軍船已逼賊舟遠不逾尺矣鮑超右肋中大礮子傷穿衣斜過皮肉均傷吐血升許而勇敢絕倫進戰益力眾軍乃益奮擊沈賊船數隻斃賊數百名乘勝衝入賊陣火箭火蛋一齊施放賊乃開船下竄我軍且追且燒轉戰二十八九

里有全股被燹入江者其船隻均被奪獲追至小軍山下始行收隊而金口岸上賊壘五處因水賊敗走亦自驚潰卽時一並踏燬是夜水師分泊金口大軍山及臣軍至金口臣楊載福遂率副將王國才等以其陸師及全營水師進屯沌口是役也賊船之被擊沈燒燬者約大小數十號奪獲千劔五百劔大小礮六十餘尊旂幟器械無算擊斃淹斃燒斃之賊無算生擒賊渠十餘名鮑超獨獲大快蟹二隻舢板二隻快划二隻陳金鼉獨獲長龍一隻快划四隻李濟清獨獲舢板一隻均驗實存記此十一月十二日水師

克復金口十五日進屯沌口之實在情形也臣等查南北各路仰仗臣天威水陸並進臣胡林翼臣楊

載福與道員羅澤南均會於金口密期同日並舉齊

攻武漢以冀速復堅城上紆宸念水師游擊銜

都司鮑超屢立奇功膽識過人此次奮厲無前身受

礮傷裹創追賊忠勇冠軍實爲克復金口之首功可

否賞給勇號以游擊儘先補用水師守備銜千

總陳金鼇奮迅攻擊奪獲最多請以守備儘先補用

六品軍功記名把總吳玉清獨禦悍賊身受七傷未

會少卻請以千總超補並賞戴藍翎再查陣亡

胡文忠遺集卷五 奏疏

七

軍功李見榮忠勇素著克復蒲圻案內已隨摺保干

總請從優以千總例議卹藍翎把總楊琢珩候選從

九品李開益候選未入流史友喬藍翎外委汪永釗

外委熊紹德外委黃鎮海外委郭榮輝外委劉百祿

外委李榮均請照例從優議卹克復崇通蒲圻案內

擬保把總瞿高魁黎立祖請照把總例議卹湖南武

生六品軍功歐陽光長沙協兵丁六品軍功王得高

周岐鳳劉鳳翥六品軍功戴曉嵐王錫福張日新于

得勝鄧勝華胡家順爭先殺賊奮不顧身均請從優

照外委例議卹其餘水陸各營奮勇出力員弁記名

獎賞其受傷陣亡之勇丁分別咨部請卹

謹接疏內請獎卹各員於十二月十七日接奉

旨準

再臣前保同知銜知縣劉蓉一員久在湘營羅澤南稱其研心經史步趨程朱而於當世之務無不窮究侍郎臣曾國藩延之幕中自克復湘潭岳州武昌以至潯城參議軍謀竭誠贊助初次保舉訓導劉蓉力辭嗣後未爲請保者欲以遂其志也今秋援鄂劉蓉管帶副右營士樂用命克復通城崇陽蒲圻皆資借箸其父劉東屏年近七十屢召之歸其弟劉蕃攻城

胡文忠遺集卷五

奏疏

大

陣亡劉蓉素性孝友負骸歸養情非得已惟念軍務至要奇傑之士不可多得懇請 奏調隨營等語前

來臣查劉蓉學問深醇器識誠篤久於行陣深知兵

畧湘勇將士素同里閭情義孚洽臨陣則指臂相應

故能所向克捷當此武漢待復江南未平必須該員

襄理營事惟因其親老回籍公義私情不遑兼顧伏

思 國事與家事必當權其輕重之序方爲不負所

學應請 敕下湖南撫臣傳諭該員劉蓉之父卽

飭劉蓉迅速赴營隨同羅澤南辦理營務理合據稟

附片 奏祈 皇上聖鑒訓示

上諭胡林翼奏請飭在籍人員迅赴軍營等語湖南在籍知縣劉蓉係因親老回籍之員惟據該撫奏稱該員熟悉營務足資襄辦著駱秉章卽飭劉蓉前赴羅澤南軍營隨同辦理營務欽此十一月二十九日接奉

進攻武昌省城大獲勝仗疏十二月初二日

臣於十一月二十一日將陸軍克復咸甯山坡水師克復金口各情形奏報在案二十六日布政使銜

浙江甯紹台道羅澤南率湘勇中左右三營陽營彪營由紙坊拔營從東路出省城之東駐營洪山臣率仁鳳南恭四營暨寶營訓營從中路出省城之南由

胡文忠遺集卷五

奏疏

五

李家橋板橋駐營保安門外五里墩其西路則令湖南九谿兵六百名駐金口以牽制之并經臣官文另

添兵勇以協其力三路犄角共圖攻擊且以杜賊之上遁也二十七日羅澤南駐營魯家巷偕鹽運使銜記名道李續賓帶親兵數十人哨登洪山審安營之地與進兵之方遙見賊於武勝門外下壇角一帶築大壘二座鮎魚套口白沙洲一帶築大壘二座以護江面之賊船使水師難以進攻望山門外八步街口築大壘二座防我西路金口之師中和門外十字街口築大壘一座防我中路隄上李家橋板橋之師小

東門外修礮臺一座子可飛中洪山其東南附城坡上築大石壘高與城等與十字街口之大壘相對以阻我東路洪山之師又築二小壘聯絡於二大壘之間使中東二路不能相通礮眼密布重溝深鑿竹簽木椿縱橫雜錯城上遍設望樓積滾水巨石於其上所以爲守省城計者至嚴且密矣江面賊舟排列兩岸省城有警則北岸之賊渡江而南漢陽有警則南岸之賊渡江而北審視之下知必南北並擊水陸夾攻始能爲力非偏師所能制勝也二十八日辰刻羅澤南率諸營進紮洪山南岡修築營盤其地可俯瞰

胡文忠遺集卷五

奏疏

三

城中賊眾聚蛇山觀望無敢出迎戰者羅澤南亦無意於戰臣於紙坊拔營駐李家橋因沿途驛路橋梁盡爲賊毀日夜修造二十八日飭寶營訓營仁鳳南恭四營各派六成隊至省城之南察視地勢逼近十字街口亦不以戰爲急乃壘中之賊見臣李家橋隄上之師至遽集白沙洲入步行街口各壘之匪約其二萬餘人從十字街而上以阻我師黃旂滿隄鎗礮噴

筒齊施勢甚凶悍候補參將普承堯率寶營知府銜直隸州知州唐訓方率訓營從隄上抵禦游擊張寅恭率恭營文生李景湖率南營繞出於隄之左都司

衙守備何紹彩周得魁率仁營鳳營繞出於隄之右  
互相圍剿隄上諸勇奮力直前殪斃其前鋒數十人  
賊敗退復頓旂來戰各營復奮力禦之如是者三四  
次相持至二時之久羅澤南李續賓登洪山瞭望卽  
派候補直隸州知州蔣益澧駐守老營防壇角之賊  
由洪山北麓以襲我營之後分右營二哨據洪山之  
脊牽制東門外礮臺之賊羅澤南率中營李續賓率  
右營二哨從中路以進軍功劉騰鴻率陽營出右路  
千總陳玉輝率彪營出左路皆息鼓捲旂銜枚疾走  
至賽湖隄邊分爲二支一支由隄上直攻附城大壘

一支辟二小壘之險由隄下踰溝越溪經湖中澗處  
以攻十字街口之壘普承堯唐訓方等見羅澤南之  
師已至暗令諸勇佯敗走賊不知我之乘其後也得  
意上追及普承堯等頓旂回殺而我師已抄出壘北  
諸勇縱火焚燒壘中之賊及其牛馬號叫跳擲無得  
脫者其追我師者亦無路可歸從隄下藕塘以竄陷  
於泥淖敗荷藕絲皆其勁敵繞塘殺之如摧枯株有  
一勇殺至數十賊者餘賊皆由十字街以遁附城大  
壘之賊見我師分支由賽湖隄上進攻遽合二小壘  
之賊來禦當先悍賊皆跨駿馬擲火毬我師以擡鎗

轟之火毬僅能及近不如擡鎗之及遠其技未盡馬  
已倒斃賊大敗歸壘我師尾之賊皆縋城而上其不  
及縋者盡爲我師所殺二小壘亦同時蹋燬與十字  
街口賊壘之火同燭霄漢臣六營之勇追賊至十字  
街羅澤南等之攻附城賊壘者因由城根橫入首尾  
交擊尸橫滿街乘勝追至望山門外鮎魚套口而止  
及壇角之賊繞洪山而東漢陽之賊渡大江而南賊  
諸壘灰燼已無濟矣日暮各收隊歸而逆賊猶據城  
自固必需各路並進始能得手是役也臣軍從中路

李家橋率六營進逼武昌保安門外五里墩羅澤南

胡文忠遺集卷五

奏疏

三

由東路油坊嶺率七營駐營洪山之南岡賊眾於要  
隘密布營壘排列大礮我軍直逼壘前誘戰賊眾迎  
拒乘勝奪入壘門各營圍繞從竹簽木椿礮眼牆隙  
中攀援而登壘中火起人號馬嘶無得脫者兩路連  
破四壘殺斃焚斃約三千人生擒九十餘人奪馬三  
十餘匹殺馬百餘匹大小黃旗一百二十餘面軍裝  
無數布政使銜浙江甯紹台道羅澤南鹽運使銜記  
名道員李績賓參將普承堯首先衝鋒知府銜唐訓  
方率各營繼之將士均極奮勇帶傷者僅止數十人  
陣亡六人容臣查明彙案請保并請賞卹仰候

聖恩現在臣官文已飭各路進攻漢陽并另派兵勇  
前往石嘴金口協剿以助聲威臣與羅澤南速攻武  
昌水師則南北兩岸上下衝擊總期迅復堅城以慰

聖廑

上諭官文等奏進攻武昌蹋破賊壘大獲勝仗一摺 剿  
辦甚爲得手所有出力將士準該督撫等查明彙案保  
奏仍著會同南北兩岸水陸各軍乘勝迅圖克復武漢  
兩城埽盪逆氛以慰盼望欽此

胡文忠公遺集卷五終

湖文忠遺集卷五

奏疏

三

胡文忠公遺集卷六

長沙鄭敦謹

湘鄉曾國荃

纂輯

永康胡鳳丹重編刊

恭謝 御賜福字各物疏 六年正月十五日

竊臣於五年十二月二十三日由驛賫奉 恩賞

福字一方藍辯大荷包一對小荷包一對銀錢二箇

銀鏤四箇杞果三筋藕粉七筋蓮子三筋百合粉七

筋南棗七筋奶餅十筋挂麩二十把到臣營臣當卽

恭設香案望闕叩頭謝 恩祇領訖伏念臣濫

膺重寄未效寸長鵝濡時愧乎章身鶴俸更慚於素

胡文忠遺集卷六 奏疏

食茲復仰承 恩寵 渥賚殊珍自 天錫

祉 璇題耀奎壁之輝匝地延 禧玉壘壯風

雲之色組紉煥彩方魚佩以增華鏐鏐鎔模合蚌飛

而利用加以甘涼絳果義取延齡薏苡瓊英性堪益

智寶蓮垂實萃德水之干枝玉屑傳餐擬名香之百

合幽圖剝棗成稱仁壽之觥塞微凝酥醅斂醍醜之

味銀絲異製兆首穀於先登 玉食頓頒轉葵心於

眠日蟻忱滋悚鼇戴彌深臣惟有勉策馳驅竭攄心

膺仰 高深之情覆宣 德意於軍民體

九童推解之恩俾頑懦咸知奮起貽億兆蒸黎之福

使閭閻共樂

昇平

遵

旨保舉得力將官附請拔補實缺人員疏

六年正月十七日

臣於五年五月內準兵部咨開咸豐五年四月十二日內閣奉

上諭各省保舉堪勝陸路總兵人員

現經用竣著各該督撫於陸路副將內卽行遴選曉暢營務堪勝總兵酌保數員送部引見候朕記名以備簡用并著各路統兵大臣於軍營副將內察核保奏其參將游擊都司守備各員如有材能出眾勇敢有爲者該督撫大臣一併覈實開單具奏欽此是時

明文忠遺集卷六

奏疏

二

臣軍攻勦武昌者不滿三千僅止哨弁勇目膽力尙可才畧無聞未堪入保上年五月內奉旨就近暫領水師數月以來詳細體察水師十餘營營官以總兵楊載福記名道員金華府知府彭玉麟爲尤著楊載福舊管右營經臣咨改統領外江水師彭玉麟舊管左營經兵部侍郎臣曾國藩調入江西總理內湖水師該二員業蒙皇上天恩不次擢用其外江水師將官十餘員查有儘先游擊李成謀身經百戰陷陣衝鋒必以身先廉明愛士士亦樂爲之用儘先游擊鮑超勇敢冠軍曉暢兵畧紀律最爲嚴明以

上二員其勇敢才畧似堪水陸方鎮之任謹據實保舉伏乞

皇上聖鑒施行又水師正左營營官儘

先游擊張啟基副右營營官儘先都司張榮貴都司孫昌凱正前營營官都司王明山副前營營官都司銜守備萬化林副中營營官都司銜守備李濟清正後營營官都司銜守備喻吉三副左營營官守備陳金鼇又前帶水師現經改帶陸勇派勦漢陽之參將何越珽游擊曾秉忠均勇敢善戰樸實不欺卽如上年十一月十二月力戰攻堅賊仿下游鳥船之式併仿大拖罟戰艦之式以二三千觔大礮堅守不動更

胡文忠遺集卷六 奏疏

三

番施放我軍僅以舳板小艇及中號長龍回環攻擊船礮均小於賊器數倍猶且縱橫出入於礮子如雨之中受傷哨官士卒已及六百人猶能兩次奪燒賊船約二百餘隻我師無一船退縮失損者其勇氣百倍約束嚴明實堪嘉尙

臣查水師利用不僅專爲武

漢而湖北湖南江南舊有水師久成虛設其儘先游擊張啟基儘先都司張榮貴都司孫昌凱王明山都司銜守備萬化林李濟清喻吉三守備陳金鼇參將何越珽游擊曾秉忠共十員迭蒙 皇上天恩獎勵補用亦必待江南一律肅清方可送部考驗可否

懇請

敕下部臣覈議準將該營官等十員遵照

奉旨先後遇有江楚水陸銜缺相當儘先推補則獎勵可期得人而軍政必能覈實似較尋常綠營將備勇少怯多者大有分別至水師十營哨官其都司千把業經迭奉恩旨準其儘先補用可否準臣

查取履歷咨部敘補出自

恩施臣所統陸勇六

營頗有勇士羅澤南李續賓所統湘營寶營訓營尤多敢戰之將弁東南勁旅誠不易得惟臣營整飭裁汰不滿三月羅澤南等營俟武漢大定再行詳確訪舉以備簡用

胡文忠遺集卷六

奏疏

四

謹按此疏於二月

日接奉

旨準

再臣所保水師之李成謀鮑超二員又附請拔補實缺水師儘先游擊張啟基儘先都司張榮貴都司孫昌凱都司王明山都司銜守備萬化林李濟清喻吉三守備陳金鼇又前帶水師現經改帶陸營派剿漢陽之參將何越珽游擊曾秉忠十員均係兵部侍郎臣曾國藩苦心訪求歷試有功之人或從陸弁改爲水營或從勇目奏保官職實東南數省中第一勁旅惟弁勇之樸拙無文不諳定例軍中打仗需才甚亟

往往循照鄉勇陋習因疾病家事請假回籍動淹旬月蓋不知官守之爲重遂不免去畱之自如臣已嚴定章程咨會署提督總兵楊載福嗣後水師將備已經出力蒙 恩拔補官職自都守以上卽照定律不準因微疾家事請假回籍其打仗帶傷者仍分別給假調理以肅軍政而勵戎行是否有當伏祈

皇上聖鑒訓示

再臣等水陸各軍自十一月二十八日進剿武昌一月以來前後蹋破賊壘十一座前後焚賊舟約二百隻而士卒中礮帶傷者水陸約千七八百人各營將

胡文忠遺集卷六

奏疏

五

官身在礮子如雨之中左右前後傷亡枕藉幸得力將官均無損失軍氣不致動搖事機尙爲順適賊船賊礮大於官軍數倍負隅不出以守爲計水師自湘潭岳州田鎮以來未有如近日之力戰攻堅者也臣

非敢一味操切不惜士卒實恐師愈久而餉愈費賊得妄生他變且江西待援方切十二月初四等日樟樹南康青山等處雖獲勝仗而兵力極單羅澤南之利在速戰亦大局宜然臣再四思維惟有分派陸師一扼武昌下三十里之青山一扼漢陽下三十里之沙口而以礮船之半駐於武漢下游則賊糧軍火不

禁自絕賊必內訌卽有奔突亦可乘其飢疲渙散痛  
加剋洗似較日夜仰攻徒受礮傷爲得計惟臣軍與

羅澤南不滿萬人已分爲二若分爲三軍則須加意

警備以防困獸之鬪而水師十營僅四千人血戰已

久大礮尤少尙恐兵分力單未得十分把握臣思沿

江郡縣總以長江爲天險卽多設數萬陸兵而江面

倘虛將賊船往來自如其糧食火葯必不能斷卽如

九江之陸兵株守而不得戰則以江面無水師也臣

已飛咨荊州將軍並湖南撫臣趕調大礮以助水師

之力並與督臣官文署提臣楊載福詳悉斟酌妥慎

胡文忠遺集卷六 奏疏

六

辦理再水師礮位模範太小前經臣於十月二十二

日奏請 敕下兩廣督臣購辦六百觔至千觔大

礮六百尊蒙 皇上硃批另有旨欽此臣兩次咨

明粵東未準咨覆合無仰懇 皇上天恩再敕兩

廣督臣葉名琛速購千觔重洋礮三百尊六百觔八

百觔重洋礮三百尊派委精實兵將護交湖南舟運

到鄂限日交代雖武漢之克復不可期待礮位坐廢

時日而將來東南征剿終必賴大礮之力豫爲籌備

乃期利用謹據實附片奏 聞

水陸攻剿疊獲勝仗疏 正月十七日

竊臣於十二月初二日將攻破省城東南賊壘四座

情形繕摺 奏報在案連日激勵各軍期將省城一

鼓而復惟自我軍兩路逼圍城外之溝壘日增城上之礮石加密更鼓徹旦又益以興國之賊萬人蓋欲困守堅城以老我師也其西路望山門外八步街口

二壘爲阻遏官軍糧食軍裝之路北路武勝門外增

角二壘爲賊通興國大冶之路十二月初二日羅澤

南率李續宜臣於鮎魚套內搭造浮橋率眾直攻

八步街口二壘以奇兵襲壘之後壘高而固卽上年

春夏閒臣所屢攻未下者諸勇奮不顧身從礮子中

胡文忠遺集卷六 奏疏

七

逼近壘前拋擲火毬火箭壘中火起賊眾大遁諸勇乘之以入截殺最多此初二日陸師攻克八步街賊

壘之事臣於初六日四更傳飭各營攻城臣由中路

督各勇攻城之西北羅澤南李續賓督各營攻城之

東南以中營攻大東門礮臺四更大雨出隊稍遲逼

城之時天已黎明城外濠深二三丈必先去其竹簽

木椿而後雲梯可施賊由城上拋擲礮石其大東門

礮臺係蛇山之脊諸勇以雲梯奮上延燒臺中火藥

斃賊數百城中大亂賊悉悍眾來拒勇之登城闕者

屢矣均爲賊礮石所阻終莫能進羅澤南因勇多傷

亡飭令暫息以待賊隨出三四千人從壇角經沙湖之尾以襲我師羅澤南令小龜山之勇誘戰引賊過湖雙鳳山之勇從而抄之截殺衝鋒悍賊數百人賊敗歸壇角此初六日陸師攻城未下敗賊於沙湖之事賊以沙湖之敗知我必攻壇角遂於沙湖澗處掘挖深溝通湖水至城根以阻進攻之路初十日李續賓往攻壇角羅澤南率中營駐洪山臣飭寶營訓營由中路往洪山接應蔣益澧以左營前驅適賊出隊掘溝諸勇往撲賊潰李續賓率右營藍翎從九劉騰鴻率後營陳玉輝率彪勇乘之直逼壇角賊悉入壘

抗拒我軍三面圍攻從竹簽木樁中衝煙緣柵而上奪入賊壘縱火焚燒賊之火藥由興國州解到者尙存壘中一時火起烈燄冲霄賊眾死亡殆盡諸勇乘勝又蹋破漢陽門外之壘所設船廠一並焚燬賊之焚死殺死及投江死者以千計城上之賊見我軍直往無前沙湖空虛由城竄伏行溝內以截我軍李續賓召諸營急據小龜山之險以待賊隊來撲勢頗猖獗羅澤南從洪山馳下由小東門城根截出李續賓等復從小龜山殺下我進而賊遂退我住而賊又來如是者六七次其前鋒之賊被戮者以數百計寶營

訓營亦從城根衝出軍勢益振賊乃竄歸此初十日陸師攻破壇角等處二壘疊獲勝仗之事十一日黎明李續賓率右營劉騰鴻率後營進據小龜山賊以小隊至我軍出小隊應之伏小槍於樹林中殪其前鋒數十人賊以大隊至我軍排列山上屹然不動賊屢衝至山脚無應之者賊亦逡巡不敢上其山前之石山爲紫荆山賊時繞山而來截我之後羅澤南因派蔣益澧率左營由小龜山東北進彪營由雙鳳山進自率中營掩旂疾趨以二哨伏山之西二哨伏山之東李續賓等見各路已至率左營後營衝山而下

分爲三隊各爲雁陣前隊進中後隊按旂不動前隊退則中隊進中隊退而後隊又進循環不已賊久戰而疲我軍不懈賊分大隊由城根出石山之右冀襲我後中營之伏於山西者挺出迎戰賊卽反走伏山東者從而截之各營並向城根橫截斃賊千餘人馬之倒斃於溝者以百餘計賊恨前此爲伏兵所敗急以大眾衝我之伏羅澤南派彪營及右營一哨助之令佯敗以誘賊賊果力追伏者回殺諸勇又從而截之賊之死者七八百計餘賊乃遁臣駐軍洪山見羅澤南之軍鏖戰不已臣卽添調仁鳳二營接應城中

之賊見中路分兵而東乘虛撲營以四五千人由望山門悍然上攻臣卽馳回督同周得魁帶鳳營回截

普承堯唐訓方張寅恭李景湖率寶訓南恭四營迎

敵分路抄截殺賊甚多追至十字街已值日暮羅澤

南李續賓等自壇角收隊聞中路軍聲亦迅赴湖路

以圖夾攻賊乃驚潰入城我軍歸營已二鼓矣此十

一日陸師兩路接戰獲勝之事賊復乘夜於望山門

外築葺石壘二重左接城根右及鮎魚套港礮眼密

布以斷我師進攻之路十八日臣令訓營寶營進攻

恭營接應南營渡浮橋以截白沙洲之賊使不得相

胡文忠遺集卷六

奏疏

十

顧壘中礮子密如雨下知府銜唐訓方率訓營攻其

前面蛇行而進受傷者多諸勇不退候補同知邢高

魁訓導李景湖率南營由鮎魚套西岸轟其腹背賊

驚而自動訓營乘之奪入前壘縱火焚燒普承堯又

率寶勇繼之殺賊數百奪獲大小旂幟四十餘面礮

十尊刀矛無算方欲攻其次壘大雨如注火器莫施

而止此又十八日攻破望山門賊壘之實在情形也

賊以前壘既破加修次壘高與城等城上以大礮護

之白沙洲之壘與壇角之溝日益高深臣等商定二

十日以三路進攻臣率南恭鳳義四營山西路乘夜

潛行出花園迂道三十餘里以攻白沙洲之壘臣官  
文調署松潘鎮總兵德恩率川兵湖南九谿營游擊  
侯鳳岐率楚兵出入步街以爲接應洲上大石壘二  
座高堅如城其西築土壘二座衛之從九丁銳義都  
司周得魁率義營鳳營先進游擊張寅恭訓導李景  
湖繼之從竹簽木椿中踰溝而上蹋破土壘二座縱  
火焚燒守壘之賊悉行駢斬奪獲旂幟礮矛無算而  
石壘之賊密施大礮以拒終莫能入李續賓蔣益澧  
率左營右營由中路攻望山門外之壘普承堯率寶  
勇以應之唐訓方率訓營仍於鮎魚套西岸衝其中

堅壘高而固木椿至十餘丈之遙右營左營之勇皆  
奮不顧身潛拔木椿得路而進逼近壘前拋擲火箭  
火毬賊壘火起訓營與侯鳳岐楚兵隔岸施鎗以轟  
之賊畏而遁而城中之賊忽以大股踞壘紛放槍礮  
我軍受傷者眾終莫能入李續賓乃令諸勇暫退誘  
賊出復分路攻之斃賊數百賊眾仍遁入壘羅澤南  
由東路率中營攻大東門並飭何紹彩率仁營陳玉  
輝率彪營相爲接應從九劉騰鴻率後營踞小龜山  
防壇角之賊天未黎明時逼近城根拔其竹簽木椿  
緣梯奮登爲賊所覺大礮擡鎗滾木亂石紛如雨下

終莫能入城中之賊又由壇角經沙湖之尾以抄我後劉騰鴻督後營禦之屢退屢進槍斃騎馬賊目二千餘人中營由小東門橫襲之兩路繞截斃賊數百賊敗入城此二十日西路蹋破土壘二座中路東路攻壘攻城未下轉獲勝仗之實在情形也探聞賊匪日由青山一帶幫運糧米火藥入城二十三日李續賓率右營出審灣一帶截賊之餉賊見我兵少忽率大股七八千人由壇角經小龜山沿湖而下李續賓督勇數百據險以戰賊眾莫之敢撓羅澤南卽令劉騰鴻率後營蔣益澧率左營出洪山之東而自率中

營及陳玉輝之彪營何紹彩之仁營出洪山之西以抄之前後夾攻賊大敗殺斃甚多溺死湖中者無數生擒四十餘人奪獲旂幟刀矛無算此二十三日大獲勝仗之實在情形也計自十二月初二日至二十三日城之東路南路東北路西南路賊壘均已蕩平而江岸西北一隅之賊壘未破臣營及羅澤南各營之登城破壘被礮中傷者已逾千數百人士卒奮勇無一隊退卻者署提督楊載福於十二月初二日黎明率水師十營自沌日出隊至鸚鵡洲賊船分紮鮎魚套南岸嘴壇角三處爲犄角之勢而以土城依倚

之楊載福派副前營萬化林從鮎魚套下口攻剿派  
正中營瞿定國副後營段康侯從鮎魚套上口攻剿  
派正右營李成謀正左營張啟基副右營張榮貴副  
左營陳金鼇副中營李濟清正後營喻吉三攻剿南  
岸嘴壇角二處南岸嘴外水落洲現賊船數十號藏  
於洲內洲口甚狹賊以大拖罟橫列其中兼以土牆  
周護礮子如雨負隅自固我軍六營攻撲數次賊船  
永不啟旋船高不可踰越遂併力以攻壇角之賊船  
而壇角之船亦復死守不動船上之礮與岸上之礮  
一齊施放拒敵我軍伺其中雜有糧食船及坐船計

胡文忠遺集卷六

奏疏

三

欲先攻其易因乘隙拋擲火器奮勇攻撲賊勢不支  
有棄船岸竄者遂縱焚賊船百餘號殺賊千餘人餘  
船逃竄六營奮力下追至青山收隊是夜卽紮漢口  
之下游萬化林等四營攻打鮎魚套燒賊船二十餘  
號惟餘大拖罟四隻橫傍河岸有土城十餘座護之  
我軍往攻四次傷亡甚多未能燒盡萬化林等遂率  
勇登岸繞賊土牆之旁以火箭噴筒攻破賊壘一座  
得大礮二十餘尊其取攜不盡者悉行封釘是夜四  
營仍回紮沌口初三日黎明楊載福復率萬化林等  
四營往攻游擊李成謀亦率下游六營從下上攻賊

出烏船七八號拖罟數號拒戰其烏船較拖罟爲高大而運動較速每船藏二千觔大礮二十餘尊子如雨點急不能近各營上下夾攻鏖戰逾時李成謀奮勇先衝賊隊張啟基李濟清繼之賊始敗退仍依泊土城之下伏而不動李成謀等從下擊之張榮貴喻吉三陳金鼇從上截之圍其一隻賊船火器齊施營官陳金鼇被燒李成謀張榮貴張啟基等奮勇攻擊不退一步船上之賊盡行擊斃其自行溺水者尤多我軍爭擲火蛋燒其風帆而船板則以沙土墊滿不能卽然極力攀援而船復高不可上李成謀等憤怒

逼近賊船以大礮圍衝之始將其船擊壞各營復併力攻其灣泊之船賊船之礮與賊牆之礮幾無隙地並有陸賊匿於賊船之側施放擡槍火箭我軍攻撲數次傷亡甚多而時已薄暮楊載福卽飭萬化林等三營回紫沌口自率瞿定國同李成謀等仍紫漢口下游北岸帶兵都統都興阿見水師下駛沙口恐其孤軍無依遂率馬隊馳三十里駐江岸以守護之露宿兩日夜屹立不動其公忠之義水師將弁倍形感奮而馬隊亦因水師之敢戰故露處兩日夜而不言勞也初四日萬化林等三營自沌口出隊李成謀等

七營由下攻上賊於黃鶴樓下至壇角地方添設土牆密排大礮我軍上下往來必由其礮口經過因思賊船不出終難攻進卽派各營長龍快蟹由壇角過河攻擊冀誘賊船出敵再以各營舳板圍剿之殊賊死守不出我軍密排大礮逼賊壘賊船而更迭轟之斃賊極多我軍亦多被礮子中傷楊載福思上游賊船未盡終不便久泊下游率十營回茶沌口初五日初六日仍率十營往攻賊竟以負固不出爲得計連戰數日共燒賊船百數十號奪獲賊礮三十餘尊旂幟刀矛無數斃賊匪甚多所有生擒長髮老賊當

卽訊明正法此水師初二日至初六日進攻獲勝之實在情形也十一十四十六等日迭次出隊攻剿該匪仍堅守不出十九夜楊載福備民船二十餘號實以油薪派副左營李朝斌帶船十餘隻燒鮎魚套之賊船派副後營周清元帶船十餘隻燒南岸嘴之賊船楊載福親率各營三更出隊周清元等暗槳潛行衝過賊營二座至南岸嘴洲頭賊已預於洲口密釘梅花樁火船不能進港僅燒其洲外小船數十隻李朝斌所帶火船亦至鮎魚套上口逼近賊船焚燒小船二十餘隻二十日黎明楊載福率大隊戰船至鮎

魚套上口派正左營張啟基正後營喻吉三專攻鮎魚套派副中營李濟清副前營萬化林正右營李成謀正中營瞿定國繼進其張榮貴之副右營周喜元之正前營紮於鸚鵡洲下以爲聲援張啟基李濟清等屢衝至黃鶴樓下更番迭進誘賊出戰賊船傍岸灣泊環以水拒船之隙處遍築小壘密安大礮我軍奮勇攻進斃賊約數百名而賊舟仍未盡破自十九日三更鏖戰六七時之久始行收隊正後營營官喻吉三受傷猶能力戰不退此十九夜至二十日水師攻剿賊船之實在情形也連日將生擒各賊訊據水

胡文忠遺集卷六

奏疏

六

師經旬力戰焚賊舟一百數十號轟斃賊千餘名燒斃五百餘名自溺五百餘名礮斃大小老賊頭目二百七十餘名等語而水師之哨官陣亡五員營官傷二員弁勇傷亡約六百餘名而無一船損失無一人退怯者臣仍令水陸各軍暫養數日設法并力攻剿以期迅復堅城所有陸師尤爲出力之外委陳玉輝面中槍子勇敢不退可否以千總拔補從九劉騰鴻身先陷陣七戰均在諸軍之先可否以知縣選用候選知縣李續宜勇敢爭先請以同知選用並

賞

戴花翎六品軍功楊高桂可否以把總補用六品軍

功傳學海可否

賞給六品翎頂外委彭澤蘭可

否以千總超補其水師尤爲出力之儘先游擊李成謀可否以參將儘先補用並請

賞加勇號儘先

都司張榮貴可否以游擊儘先補用都司王明山可否以游擊儘先補用都司銜守備萬化林李濟清可否以都司儘先補用儘先游擊張啟基可否以參將儘先補用藍翎守備陳金鼇可否以都司儘先補用並請

賞換花翎都司銜守備喻吉三可否以都

司儘先補用以示鼓勵至陣亡各員弁水師之藍翎把總賴洪興談金榜藍翎外委劉魁和外委曹勝發

胡文忠遺集卷六 奏疏

七

等弁已經

臣

官文先行

奏請議卹其水陸員弁奮

不顧身冒險衝鋒登城殺賊實皆忠義之氣倍勝平時其力戰陣亡情形可否加等議卹以慰忠魂所有

候選從九品劉卓巖請照例議卹藍翎守備張福田

劉高選請照都司例優卹千總賀采臣劉青四請照

守備例優卹藍翎把總吳秀珮羅長發王美在曾旺

益周玉堂把總黎天才請照千總例優卹藍翎外委

廖自集鍾興外委胡裕大王祥元朱福勝賀芝蘭戴

有亮黃復勝董起隆徐文章請照把總例優卹六品

軍功夏隆吉田羣良朱達明劉步駟吳勝貴咸甯山

坡案內均擬保把總尙未出奏請照把總例優卹其餘出力員弁及傷亡勇丁容臣查明分別奏咨獎卹仰候 恩施

謹案疏內請獎卹各員於二月 日接奉

旨準

再江夏縣屬之梁子湖水面寬闊港汊紛歧與武昌咸甯各縣相通外江賊匪每由武昌縣屬之樊口駛舟入湖搶掠食用經臣飭令署武昌縣林之華督同馬鄉舉人候選教諭黃守謙等齊團堵禦又派五品軍功把總余雲龍帶勇駐湖巡防上年十二月十七

胡文忠遺集卷六

奏疏

六

日林之華探有賊口僞監軍陳姓等率賊四五百人竄至武昌縣之金牛鎮聲言大股隨後卽至希圖牽綴大營之後當密調把總余雲龍帶勇往剿十九日余雲龍接信卽率六品軍功徐斌張占鼈譚運華李占魁張金榜曹得太帶勇三百名二十日行抵張橋中途與宋斯年會合適舉人黃守謙督團來會江夏三里之團總文童祝茂文吳先藻亦帶領團勇會剿該匪知覺卽列陣以待余雲龍黃守謙宋斯年督各勇向前迎敵殺斃前鋒悍賊十餘名餘賊卽潰鄉團奮勇百倍追殺數十里撲水淹斃者亦以數十計餘

悉竄逸生擒賊目匪黨共二十三人經林之華訊明  
解驗立予駢誅奪獲騾馬四匹黃旂四面偽監軍印  
一顆黃馬褂一件黃邊風帽二頂偽示偽牌解營驗  
實臣查鄉團出力士民同仇實堪嘉獎該把總余雲  
龍奉委巡防梁子湖水面舉人候選敎諭黃守謙團  
練鄉勇自去歲以來迭有斬擒隨時稟報批准獎勵  
在案今又鎗斃金牛賊匪多名大獲勝仗應請先行  
獎勵以勸將來把總余雲龍可否以千總拔補並請  
賞加守備銜舉人候選敎諭黃守謙可否以知

縣歸部儘先選用儘先縣丞署金牛鎮巡檢末斯年

胡文忠遺集卷六

奏疏

九

可否以知縣仍畱湖北補用所有打仗奮勇之鄉團  
六品軍功徐斌張占鼐二名請以把總拔補鄉團六  
品軍功譚運華李占魁張金榜曹得太四名均請以  
外委拔補文童團總祝茂文吳先藻均請以從九品  
遇缺儘先選用其餘出力各勇由臣賞給功牌以示  
獎勵除仍飭該員弁等隨時慎密防勦外所有勦辦  
金牛賊匪獲勝情形理合附 奏伏乞 聖鑒訓  
示

謹按此片於二月

日接奉

旨準

再南路之餉前奉部撥由江西省月解餉銀三萬兩  
專濟羅澤南一軍未經解到賊已竄吉安袁州一帶  
江西軍務孔亟自顧不遑勢難措解且道路阻隔不  
通十月十一月之餉皆由督臣官文設法措濟而十  
二月未能全清正月以後竟無可措之款賊匪負固  
不出克復恐稍需時日且克復後追勦搜捕均爲緊  
要所有各營餉項亟應趕籌接濟計臣營月需銀二  
萬二千餘兩羅澤南營月需銀三萬八千餘兩臣之  
水師十營月需銀二萬兩加以督臣調過南岸之川  
楚兵二千六百餘名月需銀七千餘兩又數月來水  
陸兵勇奮力進攻傷亡甚多賞卹一項勢難減省現  
值進攻喫緊之際尤須預爲籌備以勵軍心共計月  
需銀十萬兩內外除本省竭力設法隨時湊用外合  
行據實陳明請旨敕下陝西四川督撫臣迅卽  
籌措按月解銀五萬兩來營以便支放至北路馬步  
兵丁及李孟羣王國才等營餉需尤多應請敕

下部臣於山東山西河南三省趕緊協濟再查湖北  
連年用兵歲費帑項至鉅臣不能自籌而仰給於鄰  
省鄰省不能不顧念全局而代籌協濟實已應接不  
遑中夜焦思尤深憤厲惟武漢賊勢有必破之機北

岸馬隊極爲勇往其餘兵勇繁多需餉尤急經督臣  
激勵再四大有起色自當竭力攻剿寬爲籌畫力復

二城功收一簣以期上慰

宸念

硃批戶部速議具奏

胡文忠公遺集卷六終

胡文忠公遺集卷六

奏疏

三

